

а правнуки есми Сколомендовы. Збѣрем, брате, милые пановя удалые Литвы, храбрых удалцов, а сами сядем на добрые кони своя, и посмотрим быстрого Дону, (л. 176 об.) испытаем мечев своих Литовских о шеломы татарские, а сулицъ немецких о боеданы бусорманские.

И рече ему Дмитрей: Брате Андрѣй, не пощадим живота своего за землю за Рускую и за вѣру крестьяньскую и за обиду великого князя Дмитрея Ивановича. Уже бо, брате, стук стучит, а громъ грѣмит в каменом граде Москвѣ. Что, брате, стучит великая силная рать великого князя Дмитрея (л. 177) Ивановича и брата его князя Владимира Андрѣевича. Громят удалцы руские значеными доспѣхи и черлеными щиты московскими. Сѣдай, брате Андрѣй, свой доброй конь, а мой готов осѣдан. Выедем, брате, в чистое полѣ и посмотрим своих полковъ, сколько, брате, с нами храбрые Литвы. А храбрые Литвы с нами 7000 окованые рати.

Уже бо, брате, возвияли по морю на (л. 177 об.) усть Дону и Непра, прилѣлѣяша тучи на Рускую землю, из них же выступали кровавые зори, а в них трепѣшутся силные моляньи. Быти стуку великому на речке Напрядѣ, между Доном и Непром, пасти трупу человеческому на поле Куликовѣ, пролитися крови на речке Напряде. 12  
49

Уже бо скрипѣли телеги между Доном и Непром, а идут Хиновѣ поганый к Руской земли. И при(л. 178)тѣкоша сѣрые волцы от усть Дону и Непра и ставши воють на рекѣ, хотят на Мѣчи поступити в Рускую землю. И то были не сѣрые волцы, приидоша поганые татаровя, хотят пройти воюючи всю Рускую землю. 15

Тогда гуси возгоготали и лѣбѣди восплѣскаша крылами своими, но поганый Момай пришел на Рускую землю<sup>1</sup> и воеводы своя привел. А уже бѣды (л. 178 об.) их пасоша птицы крылати под облак лѣтят, вороны часто грают, а галицы своею речью говорят, орли хлѣкчют, а волцы грозно воют, а лисицы на костѣх бряшут.

Руская земля, то первое еси как за царем за Соломоном побывала. То уже соколи бѣлозѣрстии и ястреби хваруются от золотых колодиць ис камена града Москвы, возлѣтѣша под синее небеса, возгремѣша (л. 179) значеными колоколы на быстром Дону.

Тогда князь великий Дмитрей Иванович воступив во златое свое стрѣмя и взем свой меч в правую руку и помолися богу и пречистой его матери. Солнце ему на восток сияет и путь повѣдает, а Борисъ и Глѣбъ молитву воздают за сродники своя.

Что шумит и что грѣмит рано пред зорями? Князь Владимир Андрѣевич полки пребирает и ве(л. 179 об.)дет к великому Дону. И молвяше брату своему великому князю Дмитрею Ивановичю: Не ослаблявай, брате, поганым татаровям. Уже бо поганые поля руские наступают и вотчину отнимают.

<sup>1</sup> землю доб. на полях